

## Diskour Myse Vincent Meriton dan 31enm Kongre Parti Lepep 2017

### “Mon Pare Pou Servi, Mon Pare pou Reponn Lapep Listwar”

Prezidan Michel

Manm Komite Santral

Ser Delege

Myse Madamn Manmzel

Bonzour

Set anba sa temn e avek tou limilite , ki mon aksepte responsabilite lofis Prezidan Parti Lepep.

Set anba sa temn e avek loptimism ki mon vvar lavenir nou Parti.

Set anba sa temn e avek determinasyon, ki mon renouvre mon konviksyon dan prensip nob nou Parti.

Mersi pou konfyans ki zot in met dan mwan.

Mersi pou konfyans ki zot in met dan Komite Santral ki zot ti elekte yer.

Nou kont lo zot sipor pou kontiny travay ki bann ansyen Prezidan Parti, Prezidan France Albert Rene e Prezidan James Alix Michel in komanse.

Nou larout pann enn ki'n fasil. Me dan bann moman kritik, bann moman desizif, bann moman troublan, Prezidan Rene pann zanmen ezite pou pran bann desizyon kouraze, pou met lentere Seselwa, lentere Sesel premye.

Dan moman difisil, moman insertitid, moman defi, Prezidan Michel pann zanmen per pran desizyon ki pann popiler me kin met Sesel premye.

Lo lapar Parti, Mon dir Mersi Prezidan Rene. Mersi Prezidan Michel.

Zot reste lenspirasyon nou Parti.

**Me se pa zis Parti Lepep ki rekonet zot devosyon e kontribisyon. Se Sesel annantye, ki ozordi en pei fyer e en nasyon lib, ki onor travay e sakrifis ki zot in fer. En Sesel ki stab, ki ini dan son diversite e ki prosper. En Sesel ki'n evolye, ki'n fer lespas pou tou son sitwayen e pe kontinyelman ranforsi son demokrasi.**

**Prezidan Rene e Prezidan Michel, sa Sesel ozordi i fri zot travay. Mersi pou tou sa ki zot in fer pou sa pep.**

**Prezidan Michel, oun a kote Prezidan Rene depi o komansaman, oun toulstan la. Ou en senbol lwayote e travay dir. Ou non in fini ekrir dan listwar nou Parti e nou pei. M e ozordi mon tya kontan prezant ou en siny rekonesans pou ou zet en koudey ler ou pe asize dan ou fotey anba lavarang.....**

**Mersi tou bann militan, bann aktivis, bann manm e siporter. Nou'n travay ansanm. Nou'n travay avek lanmour, pou Sesel.**

Ozordi, mon debout devan zot dan soulye 2 gran personaz politik Sesel, 2 manm fondater Parti SPUP/SPPF/Parti Lepep, 2 Prezidan Sesel.

Sakenn in annan son stil dirize, sakenn in bezwen fer fas avek defi zot letan. Me tou le 2 dirizan in annan sazes pou reflesir, pou azir, e pou adapte.

### **Ozordi, nou dan en moman desizif.**

Sesel i dan en moman desizif.

E Parti Lepep i bezwen reponn sa lapel listwar dan en fason desizif.

Nou tou nou konn realite politik an se moman.

Sirkonstans politik, ekonomik e sosyal Sesel pa sirkontans 1976. Letan in sanze.

Konteks ki nou pe travay ladan pa konteks 2008. Wi, letan in sanze.

Ozordi, nou pe viv e travay dan Sesel 2017.

E nou parti, i bezwen vin avek en lapros ki reflekte nou letan, ki adres sanzman 2017.

### **Ser Delege**

**Se sa** la realite ki devan nou. **Se sa** nouveau defi nou parti.

Me Parti Lepep pann zanmen rekile devan defi, pann zanmen per sanzman.

Pou bann ki doute, mon dir 'Tenir Faure, Tenir, Pa large.'

Pou bann ki annan lenkyetid, les mwan rapel zot ki 'Kaptenn pou touzour la.'

Zanmen, depi son kreasyon an 1964, nou parti in napa kaptenn. Kaptenn i sanze, sa i en prosesis normal. Me zanmen nou'n deza napa kaptenn.

Parti Lepep in touzour la.

### **E ozordi, Parti Lepep i dir: Arive sa ki pou Arive, Nou'n Pare.**

**Pare pou kontinyen servi lepep, pare pou fer fas avek defi ki sa moman istorik in prezant nou.**

**Pare pou fer sanzman ki pou fer nou reste sa lafors politik mazer Sesel, sa lafors ki met Seselwa premye e ki'n touzour la akote lepep.**

Al dan listwar, revwar bann fe nou lalit lendepandans e liberasyon e zot a vvar ki wi, Lepep in touzour akote Seselwa pou defann zot lentere.

I annan ki ozordi zot le ziz listwar avek bann standar e mezir 2017.

Me personn pa kapab sanz listwar, personn pa kapab efas listwar.

Menm si zom i le zize, zom pa kapab re-ekrir Listwar.

Nou enterprete, nou diskite, nou dezagree.

Me Parti Lepep i dir Listwar a zize.

Listwar a zize ler ozordi i regard sa nasyon ki oze debout, kritike e proklam son drwa koman en Seselwa nenport ki son kouler, stati e lopinyon politik.

Listwar a zize atraver sa zanfan ki pe grandi ozordi, ki pran koman en fe akonpli, sa pei loportinite ki Parti Lepep in konstrir.

Listwar a zize, atraver prensip lazistis sosyal Parti Lepep, ki zom ou fanm, zenn ou aze, i annan en plas dan Sesel pou zot.

### **Ser Delege**

Parti Lepep i sa Parti ki nou annan loner pou reprezante.

**En Parti ki pou Seselwa. En parti ki'n toultan o servis lepep, pare pou reponn lapel listwar, pare pou fer sanzman ler i neseser.**

**Me nou parti pa zanmen abandonn son prensip. Parti Lepep i konnen kote i sorti. I konnen ki i ekziste pou servi, ki son lafors i dan son dimoun, dan bann zom e fanm, dan nou bann zenn e dimoun aze, dan tou Seselwa.**

**Nou annan zis pou regard evolisyon nou Parti pou realize ki i annan en Sel mo ki'n touzour la, en sel mo ki defini nou:**

**Depi, SPUP, SPPF, ziska Parti Lepep, se Lepep, people, se nou dimoun, nou Seselwa, ki rezon det nou lekzistans.**

## **Change**

I annan ki debout lo montany e kriy sanzman. Nou annan zis pou gete kote Sesel in sorti e kote in arive ozordi pou realize ki sanzman i la avek nou. Sanzman se Parti Lepep ki'n anmennen Sesel.

E se zis Parti Lepep ki pou kontinyen anmenn en sanzman ki zis, en sanzman ki pou tou Seselwa.

Lafors Lepep se pa en endividé. Lafors Lepep i son prensip ki son bann fondater in ankre dan limazinasyon nou nasyon.

En prensip ki fonde lo linite, lo fraternite, lo egalite, kot napa personn ki pli gran ki lezot ou kot serten i gany kit deryer.

En prensip baze lo egalite loportinite, dignite sak zomn ek fanm e kot tou Seselwa i annan son plas.

Se sa bann Prensip SPUP, se sa Prensip SPPF e se sa Prensip Parti Lepep.

## **Principles Today**

Ozordi, plis ki zanmen, i enportan ki nou renouvre valer sa bann prensip atraver nou Parti.

Dan en lemonn kot sa ki annan i vin pli ris e sa ki napa i trimouse, Parti Lepep i reste sa parti ki pou kontinyen travay pou elev standar lavi tou dimoun: Depi bann vilnerab ziska bann profesyonel, bann pti biznes ziska bann gran lantrepriz, bann zenn ziska bann dimoun aze.

Parti Lepep in toultan met Seselwa premye. Sa ki bon pou Sesel, in touzour bon pou nou Parti.

Akoz se nou Lepep.

## **Inclusivity/Unity**

Ser Delege

Dan nou parti i annan en plas pou tou Seselwa .

Depi bann fondater ziska bann reformer, bann kada ziska bann zenn, depi lepep orizinal ziska bann ki fek zwenn nou, Nou tou nou lepep, lepep e lepep.

Plis ki zanmen, nou bezwen inifye otour Parti e bann prensip ki nou kwar ladan.

Plis ki zanmen nou parti i bezwen vin sa platform kot nou diskite , dezagree, e eksprim nou lekor, me ler nou sorti nou annan en sel mesaz. En sel lavwa.

Plis ki zanmen, nou Parti i bezwen ekoute e ekoute; analize, eksplike e kot i fodre sanze.

**Me plis ki zanmen, nou bezwen redouble nou zefor e determinasyon pare pou servi lepep. Ozordi, listwar pe apel nou. Ozordi, se en moman istorik.**

**E ler in arive pou nou debout.**

## Rallying Call

### Ser Delege, aktivis e siporter

Me annou pa zis debout. Annou debout avek kwayans dan nou parti.

Avek konviskyon dan son prensip. Avek lwayote deryer nou bann dirizan.

Annou debout e azir.

Me annou pa zis azir,nou bezwen annan en konviksyon profon dan sa ki nou pe fer. Kwar dan nou mesaz. E kwar dan rezulta nou travay.

Annou debout e met nou lentere personel, lorgey e larogans de kote.

Annou debout pou remet nou Parti e son bann prensip ki pli gran ki nou tou, premye.

Annou debout pare pou sanz nou lapros travay.

Nou rekonnet travay dir nou bann Manm dan Lasanble Nasyonal. I pa en travay fasil. Donn zot en lanmen...

Nou bann manm pa pou ganny entimide par lakantite manm ki lot kote i annan.

Lafors lide e largiman i dan nou kote,

Resers ek bann fe i dan nou kote,

Se kalite nou lentervansyon, nou kalm e nou sanfwra ki alafen di zour pou fer ladiferans pou montre Seselwa ki nou été.

### Ser delege

A tou nivo Nou pe al lager lebra kase pou progre nou Pei.

Nou pa pe al matret personn, nou pa pou sifok personn.

Parkont nou pou lalit san ses kont kalomni, mansonz ek divizyon.

Nou pou lalit san ses kont linyorans, lendiferans ek lenkopetans.

Annou debout, pare pou servi, pare pou kontinyen travay pou elev standar lavi sak sitwayen.

**Se sa** bi nou parti.

Pou anmenn nou bann prensip kot sak Seselwa. Kot Seselwa i zwenn avek nou. Zot partaz nou vizyon pou Sesel. E ki dan lot eleksyon zot elekte **nou** kandida koman Prezidan Sesel.

### Myse Madamn Manmzel

Sesel 2017, i bezwen en Parti Lepep ki azour avek bann realite 2017.

Larealite ozordi, larealite nou sisyete e lemn modern i ki politik i bezwen sanze. Nepli letan pou zis politik partizan.

Akoz ozordi, napa personn ki annan pouvwar pou pran tou desizyon dan sa pei.

Nou annnan **diferan brans leta** ki annan zot prop **lendepandans**. Nou annnan en medya ki **lib**. En sisyete civil **ki aktif**.

Parti Lepep i rekonet sa nouveau lanvironnman. Nou pa per sa bann sanzman.

Akoz se nou ki pe asire ki sanzman i zis, ki sanzman i pou tou Seselwa.

Nou pe vwar sa toulezour dan Lasanble Nasional.

Nou vwar sa dan fason travay Prezidan Faure. Kot i konsilte, kot i anmenn dimoun ansam e pe montre ki i kapab travay avek tou Seselwa, pe enport ou lapartenans politik.

Parti Lepep pou kontinyen lo sa semen sanzman. Touzour pare pou reponn lapel listwar.

Se pou kwa ki Ozordi nou dir , ki Prezidan pei pa bezwen neseserman prezidan son parti politik.

Prezidan Faure in eksplik sa klerman lo televizyon. Se li sa **senbol linite nasyonal** nou pei.

Nou misyon se pou donn li tou sipor posib koman Prezidan **Larepublik** pou desarz son fonksyon koman **Prezidan Sesel, Nou Prezidan, Prezidan tou Seselwa**.

Se pou kwa osi ki nou siport lapel pou retir politik dan servis publik.

Annou les Gouvernman travay.

Me nou bezwen asire ki Gouvernman i travay e delivre, ki i pa zanmen blye ki i la pou servi sa pep, pou enplimat bann polisi e prensip ki zis, ki drwat e ki dan lentere lepep. Bann polisi e prensip Parti Lepep. Ble, zonn, rouz, blan, ver; pe nenport ki kouler ou ete, ou lobligasyon e responsabilite se fer Sesel avanse.

Napa nanryen pou nou kasyet. Annou asir bon gouvernans atraver latransparans e prensip rann kont.

### **Ser Delege**

Mision devan nou i pou redefini nouveau lapros travay.

Parti Lepep i reste sa fondasyon e sours prensipal developman Sesel.

Me nou bezwen revwar nou bann striktir e ansam reform sa ki neseser.

Mon mazin nou bann ansyen patriot. Myse Guy Sinon. Myse Olivier Charles. Madamn Marlene Lionnet e lezot ankor. Mon asire ki si zot ti la, zot ti pou annan en kontribisyon signifikan pou anmennen dan sa letan reform ki nou Parti pe pas ladan.

Me nou ankor annan Prezidan Rene e Prezidan Michel e lezot personaz ki la.

Se pour kwa mon pe propoz kreasyon en platform avek bann dimoun saz ek eksperyanse, pou ede dan sa prosesis reform.

O menm moman, nou bezwen konsider rekommandasyon lekzeris lannen pase ki dernyen kongre ti propoze.

Lasarite i komans dan lakour. Reform i bezwen kommans avek nou menm, dan leker nou parti e dan Seketaryat, kot nou UNION, pou met nou azour avek novo lanvironman politik tout an gardan bann prensip sakre Parti.

Nou bezwen **re konekte** avek nou bann siporter e revwar bann striktir e fason travay lo nivo distrik.

Annou pa regard nou frer koman en statistik, ou nou ser koman en vot.

Annou apres sak endividé koman en Seselwa, koman imen ki annan zot prop laspirasyon, ki fer fas avek defi e ki annan en rev.

Nou bezwen redinamiz finansman parti atraver en lapros lenvestisman pli dinamik e ranforsi lyen avek nou bann antreprenér e nou kominote biznes.

Avek tou sa bann reform, novo Komite Santral pou pran en depar avek sa ki nou ti abitye fer ;

Madam in toultan zwe en rol kle dan nou Parti depi an 1964 ziska ozordi. Nou pa kapab mazin nou Parti san bann madam. Ozordi dan en pozisyon kle mon pe apwent Madam Macsuzy Mondon koman Sekreter Zeneral.

An remersyan Msye Peter Sinon pou son travay koman Depite Sekreter Zeneral dan denryen Komite Santral mon pe apwent Msye Simon Gill koman novo Depite SG

Mon pe osi apwent Msye Charles Bastienne koman Trezorye

Finalman monn apwent Msye Sebastien Pillay koman Sekreter pou Kominikasyon.

Bann lezot pozisyon pou ganny ranpli pli tar pou donn lanpler sa novo lapros travay.

## **Ser Delege**

Nou Parti i ozordi annan 53 an.

Nou'n touzour debout ansanm, ini, pe anmenn sa flanbo lazistsis, limite e solidarite pou Sesel.

Apre 53 an, nou reste pli gran parti dan politik Sesel.

Apre 53an, vizyon France Albert Rene i reste ankor vivan.

En vizyon ki Prezidan James Alix Michel in partaze anba en sel koz.

**Me Prezidan Rene e Prezidan Michel pann zis Prezidan, zot in osi serviter lepep.**

**Zot in touzour pare pou servi, e zot in reponn laapel listwar.**

Ozordi, se nou responsabilite pou asire ki ansanm nou reponn lapel ki devan nou. Nou dwa zot sa!

Ozordi, i nou devwar pou debout pou kontinyen defann lentera nou pei.

Ozordi, labar i dan nou lanmen.

Annou sezi sa moman istorik.

**Ozordi, Parti Lepep i dir byen for e byen kler: Nou'n pare pou servi**

**Se sa nou misyon. Lepep se nou!** Mersi